



## Besluit oor appèl teen hofuitspraak

Om *Blitspos* te ontvang, stuur 'n e-pos na [bladuitleg@nhk.co.za](mailto:bladuitleg@nhk.co.za) of [grafies@nhk.co.za](mailto:grafies@nhk.co.za) en versoek dat u naam op die versendingslys geplaas word.

Nuus, berigte en kort kommentaar (uiters 100 woorde) aan [produksie@nhk.co.za](mailto:produksie@nhk.co.za)

Webblad van die Hervormde Kerk [www.nhka.org](http://www.nhka.org)

Die redaksie aanvaar verantwoordelikheid vir die inhoud. Menings deur skrywers uitgespreek, is egter nie noodwendig die beleid of standpunt van die Hervormde Kerk nie.

**Die Kommissie van die Algemene Kerkvergadering het op 25 Maart 2022 'n buitengewone vergadering gehou om te besluit oor 'n moontlike appèl teen die onlangse hofuitspraak oor die eiendomme wat gemeentes vervreem het toe hulle van die Hervormde Kerk weggebreek het.**

Die Kommissie het terdeë kennis geneem van skrywes van lidmate, ampsdraers, kerkrade en ringskommissies na aanleiding van die hofuitspraak. Die Kommissie het groot waardering vir die voorbidding, goeie gesindheid en opregte bedoelings van almal wat op hierdie manier gepoog het om 'n bydrae tot die gesprek te lewer.

Die Litigasiekomitee het die verloop van die hofuitspraak uiteengesit en ook verduidelik waarom hulle van mening is dat daar met die uitspraak gefouteer is. Die Litigasiekomitee het gevolglik op regsgronde aanbeveel dat die Kerk wel teen die uitspraak appelleer.

Daarop het die Kommissie die wyer implikasies van 'n appèl al dan nie uitvoerig bespreek. Die regsposisie sowel as die wyer implikasies vir die Kerk het die Kommissie oortuig om appèl aan te teken teen die hofuitspraak.

Die Kommissie wil benadruk dat die hofsaak tegnies handel oor die reg van 'n gemeente om hul eiendom aan 'n ander party te skenk, maar dat die hofsaak in werklikheid nie oor eiendom of selfhandhawing gaan nie, maar ten diepste oor die eenheid van die Kerk.

As die NHKA nié appèl sou aanteken nie, is die gevolge daarvan vir die NHKA geweldig groot: Dit hou nie net implikasies in vir die eiendomme wat tans in die geding is nie, maar ook vir talle ander kerklike eiendomme. Meer nog, dit hou implikasies in vir die sinodale funksionering van die Hervormde Kerk – vir die opbou van die onderlinge gemeentebande en ons ekumeniese verhoudinge, gemeentebegeleiding, diakonale werk en teologiese opleiding. Prakties gestel beteken dit dat die onderlinge band tussen die gemeentes opgehef sou word en dat ons gemeenskaplike binding aan die Kerkorde van individue se willekeurige instemming afhanklik word.

Die Kommissie wil die Kerk daaraan herinner dat die impuls tot die kerkskeuring en litigasie 'n besluit van die Algemene Kerkvergadering was om enige teologiese begroning vir die beleid van apartheid in die verlede terug te trek. Die Hervormde Kerk is toe in 'n dokument genaamd *Staat van Belydenis* daarvan beskuldig dat die Kerk met hierdie besluit (Besluit 54 van die 69ste AKV) die evangelie van Jesus Christus as die opgestane Here verloën. Daardie valse beskuldiging teen die Hervormde Kerk staan steeds.

Intussen gaan die Hervormde Kerk voort om kerk van Jesus Christus te wees. Die Kommissie roep elke lidmaat op om in toewyding aan die Here te leef, om in die gemeente en gemeenskap diensbaar te wees, om die gemeenskap van die gelowiges op te bou, en om onverkort te getuig van die betekenis wat die sterwe en opstanding van Jesus Christus vir ons inhou.

Mag die Here sy hand oor sy kerk in die wêreld hou.

**Dr Wouter van Wyk**  
**Sekretaris: Kommissie van die AKV**  
**Namens die Skriba: Ds Willem Kok**

## Lief en leed



Cornelle en J-P du Plessis

- **Ds Pieter en Susan Viljoen** van Alberton **se dogter, Cornelle**, is Saterdag 12 Maart met **J-P du Plessis** getroud. Ds Pieter het die huweliksbevestiging gedoen. Baie geluk aan die nuwe egpaar.
- **Die volgende predikante verjaar tot 8 April, en word hartlik geluk gewens:**
  - Vrydag 1 April: Ds A (Annalize) Rossouw-Lombard (35) (Dora Theo Gemeente Kimberley)
  - Saterdag 2 April: Prof AB (Ananda) Geysler-Fouché (50) (UP) en ds L (Leanie) Lemmer (34) (buiteland/beroepafwagting)
  - Sondag 3 April: Ds D (David) Barnard (58) (Magaliesmoot)
  - Maandag 4 April: Di GS (Stephan) Botha (53) (Rustenburg-Suid) en AS (Armandt) Botha (29) (Groeneweide)
  - Dinsdag 5 April: Prof T (Tanya) van Wyk (41) (UP/Nederlandssprekende Gemeente)
  - Woensdag 6 April: Ds TH (Theo) Janse van Nieuwenhuizen (73) (emeritus)
  - Donderdag 7 April: Ds FJ (Frans) Redelinghuys (65) (Sasolburg)
  - Vrydag 8 April: Di M (Marius) Bacon (60) (emeritus) en J (Joha-Lize) Uys (31) (beroepafwagting)

## Gemeentes en bediening



Prop Yvette Scholtz

- **Prop Y (Yvette) Scholtz** (beroepafwagting) is beroep na Magaliesmoot (deelyds). Sy word op 1 Mei daar bevestig. **Ds D (David) Barnard** (Magaliesmoot voltyds) is beroep na Magaliesmoot (deelyds). Albei het die beroep aanvaar.
- **Sondag 10 April is Palmsondag** waartydens ons die intog van Jesus in Jerusalem vier as die begin van die groot Lydensweek. Hier is drie skakels na **nuwe liedere vir Palmsondag**. Luister daarna en versprei dit ook na die gemeente voor die diens as die lied in die erediens gebruik gaan word.

VONKK 301: <https://www.youtube.com/watch?v=dsun4ZBHTug>

VONKK 474: <https://www.youtube.com/watch?v=Ge3aTOnEMJE>

VONKK 501: <https://www.youtube.com/watch?v=5ziPqaXbXtk>



Ds David Barnard

- Die vergadering van die **ring van Heilbron** vind nou plaas op **30 April**, steeds in **Parys**.
- **VAKANTE WERKRUIMTE: Gemeente Bethal**. Die gemeente wag aansoek in van gelegitimeerde predikante van die NHKA. Die werkruimte is sedert 31 Januarie 2022 vakant na die emigrasie van di Cobus en Mari Manders.

**Gemeenteprofiel:** Gemeente Bethal is in 1918 gestig. Die sieletal is 458 (belydende lede 345). Die gebouekompleks bestaan uit 'n baie mooi kerkgebou, saal, kombuis en kategeselokale.

**Leraarprofiel:** Die geskikte kandidaat se lewe getuig van 'n passievolle verhouding met God. Preke is liturgies weldeurdag, goed voorberei en getuig van Geesvervuldheid. Kinderdienste is deel van die gemeentebediening. Die leraar is persoonlik betrokke by en selfs die inisieerder van gemeentelike aktiwiteite, en betrokke by die breë gemeenskap.

**Posbeskrywing:** Voltydse standplaas met voldoening aan alle vereistes van die amp soos in die Kerkorde omskryf. Vergoeding, reiskoste, verlof, mediese fonds en pensioen sal, met inagneming van die skale en riglyne van die Kerkorde, onderhandel word. Huisvesting is onderhandelbaar. 'n Pastorie is wel beskikbaar.

**Diensaanvaarding:** So spoedig moontlik, maar onderhandelbaar.

**Aansoek:** Die sluitingsdatum is 30 April 2022. Aansoek moet vergesel wees van 'n verkorte CV wat die kontakbesonderhede van minstens twee referente insluit. Aansoek word gestuur na die administratiewe beampte ([Bethal@nhk.co.za](mailto:Bethal@nhk.co.za)) en die skriba ([lietsw@gmail.com](mailto:lietsw@gmail.com)).

**Vrywaring:** Die Kerkraad behou hom die reg voor om nie een van die aansoekers te beroep nie en die pos weer te adverteer.

**Navrae:** Vir enige navrae, kontak die skriba, Lietie Swanepoel (082 771 4112).



## Groot Lydensweek in Pretoria-Oos

- Sondag 10 April 09:00 **Palmsondag: Kinderdiens en Doop**
- Sondag 10 April 18:30 **Die kruis in kuns en musiek** (Prof Wim Viljoen en Pieter van den Berg)
- Maandag 11 April 18:30 **Jesus se verhoor deur die lens van die reg** (Regter Sulef Potterill)
- Dinsdag 12 April 18:30 **Die rede vir Jesus se veroordeling – historiese beskou** (Prof Andries van Aarde)
- Woensdag 13 April 18:30 **Die stasies van die kruis** (Ds Rue Hopley)
- Donderdag 14 April 18:30 **Instelling van die Nagmaal** (Ds Hannes van der Merwe)
- Vrydag 15 April 08:00 **Goeie Vrydag-diens** (Ds Rue Hopley)
- Sondag 17 April 09:00 **Opstandingsondag** (Ds Hannes van der Merwe)

- **Gemeente Newlands (Johannesburg)** beskik oor 'n **vakante orrelistepos** en is op soek na die dienste van 'n dinamiese orrelis. Die gemeente se orrel is 'n uitstekende instrument – om die orrel in aksie te sien, volg gerus hierdie skakel: <https://www.facebook.com/NHKNewlands123/videos/297136898270144>

Bo en behalwe orrelspel tydens eredienste, sal ook van die persoon verwag word om 'n wesenslike impak en 'n skeppende bydrae te lewer tot uitbreiding van die gemeente se musiekbediening. VONKK-liedere is baie geliefd in die gemeente.

Aansoek, vergesel van 'n verkorte CV, moet gerig word aan die skriba, Paul Jansen, by [newlandsgemeente.skriba@gmail.com](mailto:newlandsgemeente.skriba@gmail.com).

- **Gemeente Wonderboom (Pretoria)** beskik oor 'n **vakante kosterpos**. Die pligte behels onder andere diens by begrafnisse en gemeentefunksies, asook toesig oor die tuinwerker en skoonmaker. Die kandidaat moet verkieslik naby die gemeente woon. Belangstellendes kan die skriba, Pieter Mulder, kontak by 066 302 2768. **Die sluitingsdatum vir aansoek is 31 Maart 2022.**



## STASIES VAN DIE KRUIS

NHKA Centurion-Oos  
Napierweg 103  
Lyttelton Manor  
Centurion

Die stasies van die kruis bied ons die geleentheid om in ons eie leefwêreld 'n pelgrimstog te onderneem en in die gees die krag van die Pase te beleef. Jy is welkom om dit saam te kom beleef op jou eie tyd. Toegang is gratis. Onbederfbare items vir barmhartigheid is welkom.

Die stasies kan soos volg besoek word:

- Maandag 11 April: 14:00-17:00; 18:30-20:00
- Dinsdag 12 April: 16:00-20:00
- Woensdag 13 April: 11:00-14:00
- Donderdag 14 April: 11:00-14:00; 17:00-19:30
- Vrydag 15 April: 10:30-13:30
- Saterdag 16 April: 10:00-13:00

## Vergaderings

- Maandag 4 April: 9de ADV Beplanningskomitee
- Dinsdag 5 April: Bestuurskomitee  
9de ADV Webinaar
- Donderdag 7 April: 9de ADV Webinaar
- Vrydag 8 April: Moderamen

## Kerklike publikasies

- Sommige van die publikasies in die **Sinodale Boekwinkel** het met ingang van 1 Maart 'n **geringe prysstyging** ondergaan. Die prys van die huidige uitgawe van die **Diensboek (2007) is verlaag**. Bybelpriese mag verander indien die Bybelgenootskap hul pryse verhoog. Kontak mev Sarie Roux by [boekwinkel@nhk.co.za](mailto:boekwinkel@nhk.co.za) of 012 322 8885 x3025 vir navrae hieroor.
- Die **Doop-DVD** wat 'n paar jaar gelede vanuit die Hervormde Kerk ontstaan het as 'n hulpmiddel vir doopkategese, is 'n kragtige stuk gereedskap om die gesprek oor die Doop vir voornemende doopouers oop te breek. Daar is slegs **75 eksemplare van die DVD** nog beskikbaar en dit is nou teen die afslagprys van **R50 (in plaas van R100) per DVD** te koop. Gemeentes wat van die voorraad wil aankoop, kan gerus skakel met Justine op weekdae tussen 08:00 en 13:00 by 012 460 8441.

## Studentesake

- **Studentebehuising vir 2022. Gemeente Philadelphia** verskaf aan studente veilige behuising by Fleur de Lis op die kerkterrein. Dit bestaan uit enkelkamers met gedeelde fasiliteite. Die behuising is binne stapafstand van die kampus en winkelsentrums. Skakel dr Sanrie de Beer by 083 226 1866 of stuur 'n e-pos na [nhkphiladelphia@gmail.com](mailto:nhkphiladelphia@gmail.com) vir meer inligting.
- **Studentebehuising vir 2022. Gemeente Stellenbosch** kan veilige behuising op die kerkterrein en op die kampus aan studente verskaf. Dit bestaan uit óf enkelkamers met gedeelde fasiliteite, óf eenmensewoonstelle. Skakel dr Chris le Roux by 079 495 3239 of stuur 'n e-pos na [stellenbosch@nhk.co.za](mailto:stellenbosch@nhk.co.za) vir meer inligting.

## Toerusting

- Die **Sentrum vir Gemeentelike Bediening (SGB)** bied die **IMG-kursus** (Inleiding tot Missionale Gemeentewees) gratis oor 'n periode van ses weke aan. Dit sal via Zoom plaasvind, daaglik van 09:00 tot 11:00, en wel op die volgende datums:
  - Die herontdekking van God se missie: 28 Julie
  - Die herontdekking van missionaliteit in 'n veranderende wêreld: 4 Augustus
  - Die herontdekking van die missionale aard van die gemeente: 11 Augustus
  - Die herontdekking van dissipelskap: 18 Augustus
  - Die herontdekking van missionale spiritualiteit: 25 Augustus
  - Die herontdekking van missionale luister in die gemeenskap: 1 September

Join Zoom Meeting

<https://us02web.zoom.us/j/9427689935?pwd=d3d3K1N1cDU0a1plZCtjSS9ZSFY4dz09>

Meeting ID: 942 768 9935

Passcode: SGB

Navrae: Dr Frikkie Labuschagne by [karen@nhk.co.za](mailto:karen@nhk.co.za).



## Drie-dag-kursus om CRM-begeleier te word

### Kweek veerkragtigheid in 'n getraumatiseerde gemeenskap

- Die *Community Resiliency Model* (CRM)
- Dr Barbara Wade
- 23-25 Mei 2022, R1 000 per persoon
- Lokaal sal aangekondig word

Maar 'n takkie sal spruit uit die stomp van Isai,  
en 'n loot uit sy wortels sal vrugte dra (Jes 11: 1)

## 'n Gedig

### Parkinsonisme

My mamma is 'n bitterlemoentjie  
wat in 'n liggeel nighty woon  
sy klim – haar hare 'n goue gousblom –  
in haar gown vol daisies in  
my mamma se brein is vol l.dopa  
daarom beef haar handjies so  
sy kyk na ons, veral na my  
met oë stom wat oë vra  
hoe sal ons oor die stilte kom?

### Melanie Grobler

(Uit: *Tye en swye in die lewe van Hester H*, 1991)

## Fondsinsamelings

- **Gemeente Greylingstad: Minibasaar**  
**Saterdag 9 April**  
By die kerk in Bothastraat  
Vleis teen billike pryse  
Pannekoek, kerrie-en-rys, worsbroodjies...  
Nagereg en gebak  
Navrae: Ds Fanie Naudé 083 391 3151
- **Rata Maatskaplike Dienste**  
**Drive for a Child: Gholfdag Mpumalanga**  
**Woensdag 4 Mei**  
Highland Gate Golf and Trout Estate, Dullstroom  
Borge en inskrywings: Annette Lombard 083 231 8943  
[annette@rata.org.za](mailto:annette@rata.org.za)
- **Rata Maatskaplike Dienste**  
**Drive for a Child: Gholfdag Pretoria**  
**Dinsdag 23 Augustus**  
Silver Lakes Country Club  
Borge en inskrywings: Annelie Flanagan 064 437 5997  
[info@rata.org.za](mailto:info@rata.org.za)

## Barmhartigheid

- **Rata Nylstroom** se landlyn bestaan nie meer nie. Hul **nuwe kontaknommer** is 066 117 4723.

- Lank gelede was daar in 'n klein Franse dorpie 'n standbeeld van Jesus. Tydens die Eerste Wêreldoorlog is dit egter vernietig. Die mense van hierdie dorpie was baie hartseer en het besluit om die standbeeld weer op te bou. Hulle het begin soek na al die stukke van die standbeeld. Al die stukke kon hulle vind, **behalwe die hande van die Jesusbeeld**. Teleurgesteld wou hulle die aftog blaas, maar gelukkig was daar 'n wyse man onder hulle. Sy voorstel was dat hulle die standbeeld in elke geval weer moet opbou, al het die hande van die Jesusbeeld ontbreek. Op die standbeeld het hy toe 'n plaatjie laat opsit waarop die volgende gegrafeer was: *Ek het geen hande buiten JOU HANDE nie!*

En dit is waaroor **NHSV-wees** gaan – dit gaan oor **dankbaarheid** vir genade aan ons bewys, oor **diensbaar** wees deur ons hande en ons harte te gee en daardeur ook tot **seën** te wees vir elkeen wat ons pad kruis. Volg die skakel <https://nhsv.org.za/omsendskrywes/>.

- Die **9de Algemene Diakensvergadering** vind vanjaar virtueel plaas. So word blootstelling aan Covid-19 beperk, terwyl dit aansienlike kostebesparings vir ringe en afgevaardigdes sal beteken. Hierdie werkwyse bied ook aan baie meer gelowiges die geleentheid om deel te wees van die *Ubi caritas*-simposium oor Christelike barmhartigheid. Vanjaar word die **armoedevraagstuk** in diepte behandel, en word saam gesoek na werkbare oplossings vir 2022 en verder. Rig navrae aan ds Gerhard Stoltz by [gerhard@diakens.co.za](mailto:gerhard@diakens.co.za).

Dinsdag 5 April:	Inleiding tot armoedegesprek (Dr Martin Jansen van Rensburg en ander)
Donderdag 7 April:	Trauma van armoede (Prof Wim Dreyer en Deon Labuschagne)
Dinsdag 12 April:	Nuwe antwoorde in veranderende omgewings (Dr Frikkie Labuschagne)
Dinsdag 19 April:	Sosiale entrepreneurskap en armoede (Elna Esterhuizen en Barend la Grange)
Donderdag 21 April:	Netwerke (Ds Hannes Noëth en dr André Ungerer)
Saterdag 23 April:	Opening, konstituering en amptelike vergadering

- **Athalia Uitreik in Bloemfontein**  
**Verblyf vir en versorging van bejaardes en gestremdes**  
Enkel- en deekamergeriewe in 'n huislike atmosfeer  
Verblyf met 3 etes ingesluit  
Verblyf sonder versorging R1 700 per maand  
24-uur-versorging onderhandelbaar  
(maksimum R8 000 per maand deekamer)  
Navrae: 079 826 6363 / 084 023 0315 / 051 522 6089  
[navrae@athalia.co.za](mailto:navrae@athalia.co.za)  
[www.athalia.co.za](http://www.athalia.co.za)
- **Ons Tuis Emily Hobhouse** is die ideale tuiste vir persone wat nog selfversorgend is. Tans is daar eenslaapkamereenhede te koop teen R364 348 en R377 472. Dit is in 'n gevestigde, boomryke area met 'n lieflike berguitsig. Kontak mev Hannelie Fourie by 012 325 1857 x216 of [HannelieF@otmt.org](mailto:HannelieF@otmt.org).
- **Machteld Postmus-behuisingskompleks vir bejaardes** in Brooklyn, Pretoria, het 'n **tweeslaapkamer-woonregeenheid** beskikbaar by Frans Boshoff: Dit is Woonstel 3 teen R485 000. Kontak mev Hannelie Fourie by 012 325 1857 x216 vir meer inligting.
- **Louis Trichardt-behuisingskompleks vir bejaardes** in Danville, Pretoria, bied kamergeriewe met drie etes per dag teen R4 435 per maand. Vir meer inligting, kontak mev Vicky Muller by 012 386 5310.
- **Ons Tuis (Andries Marié Oosthuizen) in Parys** het tans plek beskikbaar in die tehuise vir versorging van verswakte bejaardes teen R9 760 per maand. 'n Volledige versorgingsfasiliteit sluit in 24-uur-versorging, drie maaltye per dag en sekuriteit. Behuisingsfasiliteite teen

R5 990 per maand is ook beskikbaar op dieselfde perseel; dit sluit drie etes en weeklikse wasgoed en skoonmaak van kamers in asook gratis deelname aan sosiale programme. Vir meer besonderhede, skakel matrone Teresa Broodryk by 056 811 2185.

- **Seniordal-aftreeoord**

Seniordal is die eiendom van die NHKA se **Gemeente Pretoria** en spesialiseer in lewensregverkope en verhuring aan selfversorgende persone ouer as 55 jaar. Die oord is geleë in Rietondale, Pretoria, wat bekend is as 'n stil, veilige, boomryke omgewing en 'n voëlparadys. Seniordal beskik oor 24-uur-veiligheidsdienste en toegangsbeheer, en bestaan uit die volgende woonstelle:

Enkelwoonstel (*Bachelor*): R510 000

Eenslaapkamer: R515 000

1½-slaapkamer: R520 000

Tweeslaapkamer: R560 000

Navrae: Salomie Stolz 012 329 4318 / 083 308 0520



## Kommentaar

“Ek wil graag baie dankie sê vir die getroue stuur van *Blitspos* aan ons kantoor. Dit is altyd lekker om te lees wat in die gemeentes gebeur. Ek vind ook dat daar altyd iets uit *Blitspos* te leer is – al is dit net uit die gedig of gebed wat met my praat.” (Engela Bolton, Rata Nylstroom)

## Betaalde advertensies in hierdie nuusbrieff

Die koste vir advertensies is **R250 per plasing (BTW ingesluit)**. Die verskuldigde bedrag moet uitgemaak word aan die Raad van Finansies, ABSA tjekrekening nommer 020-000-287, takkode 632-005, verwysing: u naam + *Blitspos*. Neem kennis dat die redaksie in uitsonderlike gevalle mag besluit om 'n advertensie nie te plaas nie en die adverteerder se geld terug te betaal.

Meer besonderhede oor advertensies kan aangevra word van [produksie@nhk.co.za](mailto:produksie@nhk.co.za).

### Gebed vir vandag

Hemelse Vader,  
ek weet dalk nie of alles sal uitwerk nie,  
maar ek vertrou op U.  
Ek sien nie uitkoms nie,  
maar ek weet dat U uitkoms sal bring.  
Ek glo dat U nou, op hierdie oomblik,  
harte aanraak,  
deure oopmaak,  
en die regte deurbrake en die regte geleenthede  
in plek stel.  
Dinge lyk nou donker en droewig,  
maar ek glo dat my dagbreek naby is.  
In Jesus se Naam.  
Amen.

[calming-quotes.blogspot.com](http://calming-quotes.blogspot.com)  
(Afrikaanse verwerking: Tessa Oppermann)